

皇明經世文編

皇明經世文編卷之二百八十四

華亭

宋徵壁尚水 徐孚遠闇公

編輯

陳子龍臥子 李 雯舒章

吳嘉胤繩如叅閱

南北督撫奏議

疏

方 廉

議覆沿海城堡存革官軍疏

沿海城堡

該臣會同總督浙直福建等處都御史胡某議照蘇
松常鎮四府地方俱濱江海國初因地設險於沿邊

去處、建立衛所、烽堠墩臺、罔不周密、復於蔡廟胡家港、增建二堡、歲撥太鎮金山衛官軍、防禦春汛、秋冬掣回、凡所以爲備倭計、夫何承平日久、武備漸弛、二堡垣舍、俱已坍塌、以致倭奴乘間突犯內地、比者荷蒙 聖恩、俯從撫按諸臣之請、准於沿海陸路、金山青南吳淞之間、添築柘林川沙二堡、沿江陸路、福山江陰圖山之間、添築楊舍孟河二堡、此真安不忘危、有備無患之長策、然四堡旣成、必須官軍守禦、誠有如該科所題、建所設官、增軍請印、乃爲經國遠圖、但

今四郡民困未蘇各衛行伍日耗不特官軍無可抽調抑且錢糧無從處給所以前任巡撫都御史翁某議題請設把總二員任劄柘林川沙二堡各統領鄉兵專聽截殺及選附近衛所官軍防守城池其楊舍孟河二堡亦於鎮江衛選委千百戶等官領兵防禦又以常鎮叅將任劄楊舍統領水陸官兵往來截殺事既周密法可經久四堡之守禦所雖未增建而居守邀擊各有所備矣及查金山衛增設遊擊將軍一員又於青南川柘四堡各設把總一員今計各堡相

距俱止五十餘里，不無官多勢分，難以行事。委應將青村南滙二把總裁革，就以柘林川沙二把總兼設防禦，不惟官有專責，抑且兵無冗食。再照吳淞江乃水陸要衝，今查協守浙直副總兵官部下中軍官郭成，由四川叙南衛總旗，歷戰有功，陞授該衛左所百戶，見領苗兵屯守其地，勇敢有爲，兵心信服。臣等欲將郭成加以把總職銜，統領原部苗兵，在彼防截，旣可使兵將相識，易於責成，又可使人心知勵，樂於奮效。况經各道勘議明白，似俱可從。伏望皇上俯念

東南重地，防禦爲要，乞勅該部再加查議，合無將柘
林、川沙、楊舍、孟河四堡守禦衙門俱免增建，及將把
總王紹箕仍任柘林，兼管青村，丁山仍任川沙，兼管
南匯，所部兵勇各一千名，無事常川操練，有警調度
戰守，如遇風汛時月，量增募兵，分守城堡，悉聽金山
遊擊將軍節制。其青村把總徐衡、南匯把總梅三錫
俱送兵部別用。郭成陞授吳淞把總職銜，就彼統領
苗兵，仍充副總兵官，部下中軍專聽陸路截殺，事寧
撤兵之日，即將苗兵責令郭成統押回籍，庶守禦得

宜。公署不必於多建事權歸一。將領不病於減增戰守各得其人。地方均爲有賴矣。

議取兵糧疏

兵糧

題爲敷陳時政以備採擇以圖久安事。准兵部咨該工科給事中吳時來題前事。該本部覆議合無咨行浙江應天淮揚各巡撫將各水路之兵并新增民壯

弓兵等項逐一從長會議要見某處某枝應存某處

增兵戊

神廟時其事已寧息故議裁減

世廟時以倭患江南非皆

某技應革務使兵精不貴于務多餉省可期于便易

等因該臣議照安內攘外守土之至計設兵定餉安

攘之大機竊惟淮揚地方濱臨江海自瓜儀沿江而東至通州海門縣由海門廖角嘴沿海而北至東海所直抵山東安東衛相距一千四百餘里地勢平衍皆倭夷出沒之區故國初建置防倭靡不周至緣承平日久武備廢弛自嘉靖三十三等年倭寇侵犯爲禍甚慘彼時守土諸臣乍經寇變事勢迫蹙議設將領增募兵勇查處糧餉請求內帑僅能集事以後防守官兵或增或減原無定額費亦不經邇年以來仰伏先帝宣威耀德之恩皇上重熙累洽之運倭

奴遠遜幸稍寧貼然夷情叵測未敢恃其不來故備禦之兵防守猶舊供億仍前但江北四府三州民財地力本自有限出辦軍需其始也勸借大戶其既也攤派丁糧又復加增稅課笑及商販江淮之間煩費加倍民委不堪故言官有此裁革之議臣自叨任以來蚤夜究心寢食未遑恐不勝任然所撫者江淮之民所守者江淮之地以撫綏而言安民爲本以軍門而言禦夷爲先二者俱不可緩又寧容舉一而廢一哉臣於接管卷內備查諸路官兵來歷皆一時隨事

設置所據損益調停委應酌處緣時值撤防未經身
親料理故於本年二三月間徧歷鳳泗直抵揚州通
泰等處操閱水陸兵馬戰航相度地勢險夷酌量分
布除得以徑自減革外議存中軍都司部下陸兵一
千二百名馬一百三十匹揚州叅將部下陸兵一千
二百名馬一百四十七匹海防道部下陸兵一千二
百名馬二百一十六匹狼山副總兵部下陸兵二千
名馬三百六匹狼山水兵把總部下水兵一千九百
八十五名大小戰船七十二隻褚家沙防守委官部

下水兵一千二十五名、大小戰船四十四隻、大和口把總部下陸兵一千二百名、馬四十四匹、邳鹽守備部下陸兵一千二百名、馬一百匹、掘港守備部下水陸兵一千一百一十二名、馬六十四匹、雇募民船一十五隻、周家橋把總部下水陸兵一千名、馬二十四匹、大小戰船四十隻、東海把總部下水陸兵一千七百三十七名、借撥民操船一十五隻、泗州守備部下原設城操班軍一千二十四名、馬五十匹、淮安委官部下原設城操班軍二千一十名、并召募水兵五百名、瓜洲

駐劄同知部下原設軍壯兵夫一千二百一十一名
巡船一十四隻此外仍有徐穎曹沂睢陳五道馬步
陸兵各一千名遇警聽調又因鳳陽南山失事該臣
督行中都留守司於入衛一所城操軍舍內挑選精
壯一千名皇陵衛於兩班守衛旗軍內挑選精壯一
千一百六十名委官統領俱經劄行遵照原分信地
水陸防守去後迄今風汛將畢江海無警臣復叅酌
往事計善後圖中間尚有一二所當并議查得揚州
府去大江六十餘里至海口五百餘里論海防均爲

要害。若府治尚在腹裡。皆因倭寇突犯。故設叅將一員。領兵分守地方。又因軍門駐劄該府。特設中軍領兵都司一員。後該前任巡撫都御史張某。改移淮安駐劄。題將中軍兵馬。仍留揚州。每年二月中旬。赴如臯縣操守。今臣看得如臯雖係通倭之路。然東接通州。已有狼山副總兵重兵屯守。以遏其來。西達泰州。又有海防道官兵以當其潰。而該縣環居其中。地方僻小。苦於屯兵。且中軍都司係傳宣號令之官。海汛有警。則軍門移駐揚州。而標下官兵若令出守外邑。

緩急調用未免缺人所據中軍都司官兵似應專駐揚州無事防守城池保固地方有警聽臣相機調遣策應其該府既有中軍都司而揚州叅將似爲多設合應裁革及照淮安府上達徐邳下連東海人性之野悍難制鹽盜之出沒無常且路當漕運咽喉境接陵寢重地防守之策尤所當預今雖設有淮大二衛班操軍丁二千餘名類多老弱且月糧支給不時枵腹訓練殊非事體相應於挑選精銳一千二百名防汛三箇月日加口糧銀一分遇有調遣日加二分

餘月照常支給再於徐邳選募精勇好漢兵三百名合營操練有警隨臣赴揚調遣防汛三箇月各日支口糧銀四分汛後日支三分原有水兵照舊存留又查得鳳陽前選軍兵內皇陵衛原各月糧八斗鳳陽等八衛所止月食糧三斗操守既同而糧餉互異似難責備相應一例均給除常支三斗外餘五斗於留守司公費餘銀內補支其揚州叅將既革該營兵一千二百名內止選三百名增入中軍都司部下轉足一千五百名庶便操守餘免召募原有戰馬分撥

各營騎操以上除減革及各道聽調兵勇外實在并
今議選募水陸兵共計二萬三百五十四名馬一千
六十九匹大小官戰船二百隻內除淮安水兵另有
口糧掘港守備東海把總二營舊有備倭軍舍并泗
州淮安鳳陽城操班軍瓜州軍壯兵夫各支本等月
糧工食及另項加添口糧與泗州守備營馬匹草料
俱不支軍餉外實支軍餉官兵一萬二千二百六十
二名通以防汛三箇月計之每名日支口糧四分其
該銀四萬四千一百四十餘兩常操九箇月減支每

日支銀三分共該銀九萬九千三百二十餘兩戰馬一千一百一十九匹不分防汛常操每匹日支草料銀二分共該銀七千三百三十餘兩一歲通共該銀一十五萬七百九十餘兩又徐穎曹沂睢陳五道共兵五千名遇警調用行糧草料并修造戰船火器犒賞等費尚不與焉及查往年歲徵各項軍餉一十七萬有奇節經議減止存一十三萬六千餘兩除設處關稅磨稅銀一千六百二十餘兩外餘俱分派四府三州夏秋稅糧馬田民壯快手戰馬草料內出辦以

終歲所入較之支數計少銀一萬四千七百九十餘兩尚本不敷但查鳳陽所屬係皇祖陵寢根本重地除原額民壯軍餉外又加添民壯一千三百九十一名每名徵軍餉銀一十二兩其銀一萬六千六百九十二兩實爲偏累合於每十名內量減三名共減去四百一十七名該銀五千四兩止徵九百七十四名該銀一萬一千六百八十八兩稍寬民力但該府原無城垣該臣勘議欲於府治及高墻五處共築一墻保固同因錢糧無處未敢輕舉合無將前減民壯

再徵三年存貯府庫。聽候題請勘築墻垣之用。以後除豁。

會議漕政疏

漕政

一酌處羨餘以恤軍困。竊照糧運交完。羨餘銀兩。給散旗軍。乃朝廷優恤厚恩。近因河道變遷。糧有漂失。節經議留前銀。通融完補。此實國儲至計。臣等敢復何言。但在運軍旗。春去冬歸。衝風冒雨。勞苦萬狀。行糧有限。食費不足。交糧進倉。惟望羨餘以濟回途之用。况漂流患有大小。衛船幫有多寡。使趙甲掛欠。扣

及錢乙舊糧不完扣及新運是使姦使者得計而守法者失望且空船缺食無力牽輓每每凍阻回船既遲新兌益誤以致年復一年運務廢弛相應酌處伏乞勅下該部從長酌議羨餘銀兩除糧運進納別無漂欠照常給散外自隆慶二年爲始如大患漂流先儘本幫次及本衛本總小患損失先儘本船次及本幫本衛悉聽運官把總議處務在當年補完掣取巡關繳報其同總別衛并同衛別幫無扣旗軍羨餘銀兩亦俱照常給散不致一槩扣留寄庫庶困疲貧軍

得沾恩恤之典而船得早回運務有濟載入議畢永
爲遵守

一議處帶輓以速糧運據江北等總運糧把總郭旦
等呈奉漕司行委催贊重運糧船晝夜前進無敢後
期經過臨清地方例該順帶城輓但上廠中廠去河
尚遠幫船在閘候領河窄船多擠塞耽誤惟開外下
廠就臨河岸於軍便於領帶呈乞議處等因到臣爲
照漕儲轉輸利在速達連年稽遲凍阻皆由徵兌愆
期運道梗阻所致今歲節該臣等督責各該把總等

官竭力催償務期早得上倉今稱經過臨清帶輓上
中二廠遠涉不便乞要改派開外下廠一節無非欲
速糧運之意相應議處伏乞勅下該部酌議轉行臨
清管輓工部分司自隆慶三年爲始將各總衛所糧
船該帶城輓盡畱下廠照例每船四十八塊待幫船
出閘就廠搬領庶得速行糧運有濟載入議單永爲
遵守

革鳳陽守備事催疏

鳳陽守備

凡濟京陵邑宜照前代事體不宜設守節宜用重
題爲姦惡守備太監玩法敗度蠹國殃民懇乞 聖

明剪治以安地方事據潁川兵備僉事劉得寬呈奉

撫按劄案前事行據鳳陽府呈稱該本府知府周汝

德議照鳳陽迺

祖宗根本重地湯沐之鄉上有

皇陵皇城下有五處高牆安插庶人洪武永樂年間

止設太監一員前來侍奉香火兼管皇城門禁高牆

鎖鑰並無守備職銜亦無操練軍馬干預詞訟事權

官吏得以盡其職守軍民賴以安其生業後至宣德

年間始被奏討守備彈壓官吏彼時原無巡撫軍門

守備之設猶爲有名至於嘉靖三年太監王德妄竊

守備在任欺凌軍衛有司剝削地方百姓人情憤怨至嘉靖十年該鳳陽縣土民田學奏行撫按會勘明白覆奉欽依王德著小心謹慎奉侍皇陵仍兼管皇城安插庶人門禁鎖鑰其一切軍民事務不許干預官民兩安近被太監趙芬復行朦朧奏討守備僭竊兵權濫受詞訟虐官剝民無所不至即今一切軍政事務有撫按爲之總制兵備道爲之分理畱守司爲之操演事體亦既詳且密矣而復存守備不惟頭緒多端亦且騷擾無益若不議處將恐後來太監復

皇明經世編

卷之一

十一

平露堂

蹈前轍深爲地方貽害合無題復舊制遵照宣德以前事例將以後太監革去守備職銜不得干預兵柄擅受詞訟止令照舊奉侍皇陵兼管皇城安插庶人門禁鎖鑰庶舊章復而僭竊可杜官民安而地方寧謐矣又據中都留守司經歷司呈該本司署正留守周臣議照鳳陽太監因假守備之名操練兵馬則凌虐衛官恃強求索使武職喪氣一也包納班錢縱放軍丁使營伍空虛二也倚恃巡捕騷擾地方使軍民破家蕩產三也調取各衛軍夫解納班銀使軍職

指稱科歛四也。往事可鑒。委應酌議題請。止令其奉侍。皇陵并皇城門禁鎖鑰。兼管高牆安插庶人。則事體安妥。軍民受福。具呈到道。該本道覆議相同。轉呈到臣。據此案照先准兵部咨。該直隸巡按張啓元奏前事。該本部議行鳳陽巡撫方廉會同巡按御史公同勘議。前項守備應否裁革。事權應否增損。地方事情有無相關。議擬區處停當。會本具奏。覆奉欽依。備咨前來。今據前因會同直隸巡按王友賢議。照皇陵香火。聖孝所關。雖經設有奉祀。若無欽命內

臣專管侍奉恐非朝廷崇祀 祖宗孝敬至意皇城
門禁鎖鑰原係舊內重事至於高牆庶人又皆各省
違犯宗室尤難安置鈴束相應照舊仍聽欽遣內官
管理其守備地方一節既有文武官員互相統攝前
項討復職銜似應革除乞勅該部再加酌議上請合
無將新任太監姚臣換給勅諭止令照舊奉侍 皇
陵兼管皇城安插庶人門禁鎖鑰其操練兵馬緝捕
盜賊軍民詞訟一切事務並不得干預庶官無掣肘
之難民免剝膚之苦地方得以寧謐矣。

論

江南諸郡

松江海防

松江自金山衛至南匯所官軍各分信地各有定額
每歲二月上班十月掣班青村以東各洪港舊制係
青村官軍把守南匯以北各洪港舊制係南匯官軍
把守今查修復海塘須照舊分派但太倉鎮海嘉興
同有倭患貼守官軍似難調發相應於金山青村適
中如柘林地地方南匯吳淞江適中如七八團地方添
設陸路把總二員各領精兵一千如募到狼兵邳兵

之類若兵數不敷就於沿海招募義勇照依客兵支給口糧各官兵即於柘林七八團暫借民居劄營隨路有警相機策應不許潛住衛所城中各設守禦官軍悉聽鈴轄此松江海塘設備之大略也若沿海港口金山以東有翁家港蔡廟港柘林滙缺等處南滙以北有四五六七八九團洪口川沙窪清水窪等處皆宜設船防守按舊制金山衛所造船各有定額俱就各衛所派撥巡軍在海巡邏正統間因海患寧謐或以船爲虛費題准以江船易馬而哨船之制遂廢

矣。今議設船隻。一馬之資。不足以備一船之用。官軍窮苦。又難賠贖。合令每馬二匹造船一隻。再於衛所查有地租公費銀兩。與松江府庫軍前銀內相兼贖數。每船量貼銀十兩。金山衛總委一官督造。其各船應用器械火器。合於原議太倉置造軍器內給發。聽用。就點各衛所知水軍人。操習水戰。布列港口。各分信地。如倭賊突至。而縱容其停泊者。服以上刑。則自無規避之患矣。此松江海港設備之大畧也。夫沿海設備固爲上策。萬一外守不固。則黃浦一帶。又爲蘇

松險要。守浦乃所以守門戶。猶有愈於守城也。今吳淞江口。即爲黃浦口子。既經設備。而吳淞江所。亦設兵一枝。以防深入矣。而至於上海之高倉渡。沈庄塘。周浦。閘港。閘行。華亭之葉謝。曹涇。張堰等處。賊一登岸。搶船渡浦。甚易。除松江府先後打造雙塔船。磨船。各發上海華亭。各召募水兵。分布沿浦各港。巡邏把截。又華上二縣。各募鄉兵。護守城池。有警調至浦邊協守。但前項兵夫。官無專職。則事難責成。而沿浦二百里之遠。本府巡捕官一人。勢難管攝。合令清軍同

知一員帶管華亭鄉兵水兵。自豐涇以至閔行。皆其信地。再設巡捕同知一員。住劄上海。專管該縣鄉兵水兵。自閔行以至嘉定界首。皆其信地。無事率兵操演。有事統兵防守。蓋同知名位稍尊。威令可行。又甲科之左遷外補。與舉人之才望陞遷者。皆得爲之。庶濟實用。若止設通判。則爲官非樂就。而下亦玩視。此松江內地設備之大畧也。然倭舶之來。乘風渡海。勢難聯絡。每至海外大山。必停泊候齊。然後深入。照得羊山爲本府所屬。爲定海吳淞江二總兵兵船會哨。

之處以地里適均故也。本府所造之船數本不多。僅
可以支把港之用。此但可以言守而不可以言戰。須
得福船蒼山各數十隻。沙耆民船二三百隻。每至風
汛時月。分泊港口。各住信地。更番出至羊山。往來遊
擊。晝夜不絕。外則爲定海吳淞江會哨兵船之羽翼。
內則爲海港把守兵船之捍衛。遇有海賊。齊力奮擊。
將見賊船鯨散而少。我兵船綜合而衆。盛衰之氣勢
既分。則勝負之分數自判。得海防之上策矣。抑猶未
也。查得沿海民灶。原有採捕魚蝦小船。並不過海通

番。且人船慣習不畏風濤。合行示諭沿海有船之家。
沿海偏垠皆勇悍可用今海寇不畏官兵力畏沿海
赴府報名給與照身牌面無事聽其在海生理遇警。
居民也
隨同兵船追剿此則官兵無造船募兵之費而民灶。
有得魚捕盜之益此松海洋設衛之大畧也。

皇明經世文編卷之終

皇明經世文編卷之二百八十五

華亭

李雯舒章 陳子龍臥子

選輯

徐孚遠闇公 宋徵璧尚木

宋徵輿轅文叅閱

蕭同野集

疏

蕭端蒙

條陳地方事宜四事疏

征苗機宜

臣待罪貴州奉職無狀既不能貞肅諸司以銷殷患又不能振厲武事以遏寇衝坐使苗賊縱橫生靈塗

炭以厯 君父之憂愆罪萬甚茲方簡集師徒奮揚
威武徼幸桑榆之收少追立山之責而臣代次將及
又以患病具陳調養誠恐區區犬馬之心無以自效
故敢即所見聞條爲四事昧死上陳伏惟 皇上幸
垂聽焉一曰決大計夫治苗之議不過撫剿二端自
苗叛十年以來大率皆用撫議然以臣觀之今之所
之通弊也謂撫者非威有以制苗之命恩有以結苗之心而使
之就撫也不過厚利以啗之曲意以邀之上下相蒙
共爲欺罔其或諸苗厭倦數月不出方且自以爲功

此言弊

而弛兵撤備矣。一旦卒有警報。倉皇失措。無所爲計。於是多方掩護。以求免責。箝制細民。不得控訴。文過遂非。執撫不改。而生靈魚肉。壤土踐蹂。固所不恤也。臣思兵凶戰危。撫非不可。然撫之而無煩於費。撫之可也。費矣而無傷於體。撫之可也。傷體矣而有益於民。撫之亦可也。今則口糧縱其資給。歲餘魚鹽。犒勞時頒不計。費不可謂不煩矣。戕民于大都。則莫敢致詰。訟民於公府。則代爲甘心。惴惴媚承。如事大國。惟恐少忤其意。以速其叛。體不可謂不傷矣。然而朝方

受撫。暮已出劫。殷勤招諭。曾不足以繫其心。果何益於事。而乃孜孜以撫爲也。臣自蒞事以來。廣察士民之情。聞征剿之舉。則欣喜如狂。聽招撫之議。則疾首相告。人情如此。是非可知。言撫諸臣。非不及此。然而不勝患得患失之心。養資待遷之意。是以甘爲輟駒鼓眩邪說。此效彼尤。以迄今日。而銅仁一方。咸靈法令。蓋蕩然掃地矣。故征勦不行。撫議不展。則西南之患。未有已期也。近者伏奉 明旨。期於尅平。安邊大計。無以易此。以故西南軍民。幸撫之去。快征之來。莫

不歡忤鼓舞思見武功之成。即今湖貴二省。合兵舉事。進哨有期。蕩滅可待。但恐當事諸臣奉行未至。或首鼠不決。或逗遛不速。則於机畧不無少左。臣願

陛下明示意嚮。重加責成。諭以征勦之機。決不可失。

大創之後。兵威既震。則招撫亦可行矣。

戒以招撫之策。決不可行。其有異議者。治以欺罔之罪。庶以杜塞邪謀。壯揚兵氣。堅將士必戰之心。而慰士民來蘇之望也。二日議糧餉。切照叛苗巢穴。竹箐叢密。溪洞險峻。每聞兵至。輒棄其巢。分散逃命。踰伏巖谷。官軍之臨。不知地利。雖加窮搜。所獲不多。以故

往歲征勦鮮有大得志者

○苦○地○勢○既○廣○豈○能○設○長○

圖○惟○當○扼○其○要○路○耳

臣聞土人之議惟有久圍

頗爲長策蓋我師旣合分布搜勦彼旣不敢出以求

食而資畜無何久當自斃查得嘉靖二十三年征勦

賊以瀕困所需者旬月耳當時班師太早遂使殘喘

復生銅仁吏民至今恨之况聞今歲賊中禾稼俱爲

蟲災無所收穫雖有搶刼牛馬米穀等項計亦不多

若能遲以月日自可坐收全功但恐資糧不繼難以

久駐則其勢不得不撤而垂成之功遂虧於一簣矣

往年之事聞亦以此今宜鑒往懲弊廣處糧餉以爲

可久之道。但貴州地方褊小。兵糧已竭。極難計處。查得湖廣糧米充溢。由水運可以達銅仁。頗爲便利。況該省原有額解貴州折糧銀兩。合無暫令改納本色一年。或湖廣折筭腳價。徑運交割。或貴州出備夫船。自往交兌。其或本折互有低昂。俱從時估抵筭。是固善策也。議者每以各分彼此爲慮。謂該省必不樂從。然以臣計之。湖貴之勢。本成輔車。若貴州以速撤失利。則湖廣豈能以獨制成功。苗寇未滅。後憂方長。來歲之間。必當再舉。則糜費愈鉅。用力愈難。固不若因

丘爲山雖勞而功省。羨補不足。雖費而事成。其於二省似爲兩利。又況數本歲徵。非額外之求。價從時估。無重困之累。宜若無不可者。乞行貴州巡撫都御史多方預處糧餉。或趁時糴買。或懸則召納。務使倉庾充實。入夏不缺。仍行湖廣巡撫都御史一體處置。及將嘉靖二十六年額解貴州錢糧。照臣所議暫改本色兌納。并行撫鎮各官督率將卒。戮力收剿。必俟夏交之後。兵威旣伸。苗類就盡。方許罷兵。其有推託誤餉。詭飾撤兵者。聽二省巡按御史糾劾。庶乎資糧旣

足勝筭在我以攻則可勝以守則可固而賊將坐斃
矣。三曰嚴駕馭訪得湖廣永順保靖二司四川酉陽
平茶二司俱與苗酋密邇黨逆煽亂罪甚於苗。平居
通串之惡臣固不暇言矣。至于用兵之際懷奸尤甚
不但窩藏逋匿而借兵助糧漏機賣陣無所不至用
之則懼其二心於我致誤兵機不用之則懼其合勢
於苗重貽患害而酉平之爲貴州用復恃異省驕恣
萬狀。脅求厚餉要索增兵視之永保尤爲難馭故議
者謂制苗不難惟制諸司難耳蓋以此也。臣訪之與

議謂駕馭有方。雖狙詐可作使。况諸司乎。切以爲苗

寨之地。外環三省。今湖廣舉事。而四川不預。似非事

體。宜令方面官分領官兵。坐鎮酉平。制其後路。一則

之故智也

可以截苗賊奔逸之衝。一則可以折土司桀驁之氣。

而又令四司各質其愛子一人。羈于內地。以繫其心。

其猶有懷奸黨賊如前所云及逗遛無功。妄殺希賞

者。各視其罪。削職割土。有差。若能建立奇功。克破三

五寨。擒斬二百人以上者。賞以千金。或以所克地與

之。若上官不忠。而目把有能。自來報効。獲功多者。授

以巡檢職事。割所轄地。以官之改屬流官衙門。則庶乎重賞必罰。而土夷亦當知所畏慕矣。或以爲土官植根已固。加之削奪。勢所難行。臣則以爲非也。夫以國家之力。何所不克。臣觀諸司之強。視之岑猛。曾無什一。然先年取田州如驅雞犬。此輩寡弱。又何足言。況彼之所以能馭其下者。亦恃朝廷之威靈在也。土官旣叛。朝廷則目挹叛土官。况有賞以驅之。失誰不效忠。求異以希爵土之榮也。將不勞兵而自削弱矣。或者又以爲千金之賞太重。後將難繼。臣亦以

爲非也。蓋銅平之苗不及八百。鎮筸之苗不過三千。計其賞資約以二萬有奇而已。此不過一歲撫苗戍兵之費。而可以永殄苗患矣。失此不爲。而欲以常格戍事。未見其可也。乞勅兵部特降榜諭各一道。分示諸司。使知賞罰條格。仍行四川巡撫都御史分遣方面重職。持兵坐鎮酉平。并行川湖二省。將四土官應襲兒男。羈于附近府州候事。寧日遣歸。如有異志。即以屬吏駕馭之術。此其最急者也。再照貴州調用軍兵四萬。而宣慰安仁部下三萬。雖通苗之惡。保其

必無。但臣觀其隊伍不整。沿途擾害。則其約束無紀明矣。誠恐進勦之間。仍復如是。則違令不進。妄殺冒功。離次先逃者。彼皆無以禁之也。誤事殃民。所係非小。亦乞特降榜諭。示以威法。如有奇功。照前賞勞。其或失事。本官降職。目把依律問罪。庶乎有所畏警。而兵皆節制矣。四曰畫遠策。夫征勦機宜。臣愚畧陳之矣。而所以規畫措置。以爲善後之計者。尤不可不豫爲之所也。臣查得銅平鎮。軍地方屯堡稀濶。戍兵單弱。制置疎畧。備禦廢弛。以故寇賊縱橫無忌。臣以爲

宜行二省撫鎮等官乘今兵合之時於湖廣苗巢之界以衆之力因地之利開鑿大道以通往來此路既開則我之脉絡貫通其威自壯而苗之窟巢斷絕其勢自孤此則當今急務所當首圖者也然後相其便宜修立哨堡或環路爲守或據險爲備舊堡之當損益者損益之新堡之當增置者增置之或輪戍旗軍願留者留之或遠近軍民願募者募之或招集流移聽其復業或團結土著使自爲保或召募他處熟順夷民填實或起發諸司勇健土兵住守或漢夷一處

雜居。或軍民分布間處。務使屯堡相望。聲勢相倚。軍民相參。犬牙相制。而凡附堡空閒地土。俱撥與儘力墾種。且耕且守。以爲捍備。此則二省要機。所當詳畫者也。然或者猶以土夷之募。恐貽後患爲慮。臣則以爲是不足憂也。夫漢人順而弱。土夷悍而強。必欲捍禦。非夷不可。但使安插之時。度其輕重。制其衆寡。於彼此間錯之中。寓漢夷頡頏之意。則善矣。況今如黃連溪獅子崖等處。不過倚苗爲亂耳。使吾之勢旣盛。可以制苗。則彼無所假託。又安敢獨逞也。是在當事

者加之意而已。若使如臣之議，哨堡旣密，招募旣廣，兵皆久居之衆，人有自保之心，處置得宜，彈壓遂定，使其苗蠻一旦底平，則吾不失其經野之規，若或殘孽乘間竊發，則吾又不廢其先事之備。所謂善後之策，信無易於此矣。

條陳邊省吏治四事疏

貴州吏治

竊惟國家之撫有方夏，建藩臬者十三，而貴州亦列其一。雖越在要荒，壤域褊小，然控夷夏之交，扼滇楚之吭，壯內威外，最爲重鎮，故建置流官，所以宣布威

化輯綏封疆監護夷酋錯揆武衛視之諸省尤當致
慎邇者廟堂之上率以邊方薄之其所以待貴者
與中土頓異官秩之制多從簡畧受職之士多乖實
用雖內外詳畧之體不得不然而抑揚輕重之間未
免太甚此疆域所以未寧而化理所以未一也臣待
罪地方細加咨訪咸謂貴州之患莫急於吏治不足
幹辦無託機事坐垂因循不理以迄今日借使官屬
衆盛賢才布列則彈丸之地勢非難理羣力共濟未
及無績也豈至皇靈國法閤滯若是也耶臣謹採

集聞見、按剔事原、列爲四事、條具上陳、

計開

一曰除授太輕。竊見貴州地方。雖設有文職流官。然除授居此者。非爲事遷謫。則不及改調。非監胄告遠。則胥吏雜流。才望之士。科目之英。率不除此。以見在計之。二司方面。遷調者半。各府知府。非盡科目。其餘官員。舉人出身者三人。餘皆例監吏承爲之。求其以歲貢授者。蓋已不多見矣。夫遷謫之官。沮抑之餘。志愚謂邊方郡縣之吏。必保舉正途之有才者。而用之。陸擢北內地。如優則興銳之士。皆樂赴功名之會矣。意局縮。兼以自生疑畏。慮必未路難全。觀望優游。勢

所必至。至于監胄雜流之士。雖才識所賦。未可槩濫。然資格所限。趨向頓殊。榮進之階。旣不足以鼓其氣。俸給之利。又不足以繫其心。因循苟度。曾無實志。縱使奔走就列。不過應答彌文。而况前項官員。又皆有不復顧惜。甘於下流。難以盡舉者乎。臣思銓衡之上。固非薄此一方。不過以爲邊方事簡。慮在人材而已。臣竊以爲斯言似矣。而實非也。夫中州之地。政務雖繁。然事有端緒。勢易弛張。循守繩墨。自足致理。貴州則不然。事機盤錯。節目糾紛。非有利器。莫能紓解。此

其難易自迥別也。況於官秩多虛。一人常兼數事。苟得其人。必須廣攝。衆簡所萃。亦足爲繁。豈至優游寂寞。老其才而無所用乎。近者銅仁多故。諸務益繁。治兵主餉。調度不易。則其除授。尤不當泛泛然而已也。臣乞自今以後。凡貴州二司官。俱以才望素著者陞任。遷謫調改者。姑勿畀之此方。各府州縣官員。量以進士舉人銓補。其銅仁守巡兵備有司等官。尤必極加遴選。勿以瘠土而輕之。勿以裔壤而忽之。勿以恤私爲念。而有所徇。勿以避怨爲心。而有所憚。則庶乎

公選之政也。

二曰曠缺太盛、竊見貴州地方壤域甚遠、憑限甚寬、赴任官員、徃徃逾年始至、又以土皆貧瘠、地多險惡、俸糧柴薪、倍加涼薄、而例無馬夫、又與各省迥異、仕途所薄、素指爲忌、萬一選除、不勝怏怏、領檄之後、類多棄捐、其或情非得已、勉強而來、就職未幾、厭心遂起、於是閉戶托疾者有之、棄官私逃者有之、得歸爲幸、遑恤其他、故貴州諸司、有選官經年而不至者、有缺官數年而未補者、而總署二司印者、有以一官而

並管各道事者、有以知府署兵備者、有以經歷等官署府印者、甚至武官土官、亦令代署、此皆各省之所未聞、而貴州之習以爲常者也、缺官若此、其欲事集民安、不亦難乎、臣乞自今以後、凡遇貴州方面等官有缺、俱於附近省分推補、嚴立憑限、令其作速赴任、庶幾旬月可至、不至久疎職事、其餘合屬小官、就將本省應選監生吏丞、并四川湖廣原役貴州吏員、內殺賊建功者、爲之長吏、必得其所、其用之、銓補仕宦、不出其鄉、使之樂於就職、風土其所熟歷、不至速生厭心、是或止虐實曠之一道也、

三曰員役太簡竊見貴州原設官員不及中州一府之數雖有思州等八府但各府只設有知府推官各一員額數原少空缺常多緩急之間莫可倚屬甚至數府通缺求一委署而不可得者幕職權攝體統既乖文移事體多有未便所以先後撫按諸臣議於各府添設佐貳一員蓋欲官屬稍盛庶幾委託有人節經具題未蒙施行臣思撫民者此特爲貴州言之可耳廟堂之上不過以爲增官則擾民故付之寢閣耳然以臣計之官雖增設而於民則固無所擾也何以言之貴州缺官蓋參之一即

以缺官俸給。轉資增置之官。蓋已充裕有餘矣。固不必加賦於民爲也。況貴州之病。惟官簡爲劇。故置一官。則民受一分之福。正不當靳費惜財。而況於賦無所增。民無所擾。人情政體。深爲便宜。此前諸臣之所。以有議。而臣所以敢於再申也。伏乞俯從諸臣節議。於思南石阡銅仁程番都勻等府。各添設同知。或通判一員。其鎮遠府同知通判推官俱係土官。亦乞增設流官佐貳一員。協同管事俸糧柴薪。俱於司府缺官貯庫銀內支給。分毫不以歛民。其增置各官。仍乞

以科目出身者銓補員盛則任使自裕何有於叢委而莫紓官闕則委署可圖不至於肆顧而莫屬公有集事之便民無加賦之擾是亦邊方之一幸也

四曰更遷太驟竊見貴州方面官無久任政無久思優游飾觀鮮有實效求其所以蓋更遷驟忽之故也何以言之貴州地遠法疎得陞之後莫不枉途以爲展省比其履任也較之初陞已逾歲矣蒞事未幾年資已及同時之人俱已遍轉則銓衡之上固不得不循資以敘遷其位即其不然又以乏人次當入賀往

返之間、復歷一歲、資深叙轉、蓋所必然、計其歷考、歲月雖深、然居閒之時多、實任之日少、資勞累積、半在道途、官次所居、僅如傳舍、驟忽若此、雖有鳩偃之士、志未及伸、席未暇煖、輒已得命而去、而況中材以下、恒樂私便、彼知不久於此、又安肯視官事如家事而盡力以爲之乎、故拜官於此者、非應荅故事、則粉飾彌文、蓋孔掩癥、徼幸無事、委艱推患、以遺後人、日復一日、彼此相仍、事務叢積而不理、地方震竦而未寧、其原蓋出於此、臣乞自今以後、凡貴州方面官員、遇

缺而推用者。不必盡拘常資。雖俸淺者亦得推。而其
既陞也。必久任以責成之。使之以後資補前者可也。
在任而應陞者。不必盡如常格。雖資及者姑勿陞。而
其再考也。必越級以優異之。使之以殊寵。酬積勞可
也。庶乎委任既遠。責難猝辭。縱使遺大投艱。亦將躬
蒞力任。自不至推奸避事。泄泄然如今日者矣。

議處驛站六事疏

貴州驛站

題爲議處驛站事宜。以蘇困苦事。切見貴州地方。爲
四川湖廣雲南三省交道。使客往來。殆無虛日。供應

繁難公私疲憊兼以軍夷貧瘠戶口稀少地薄費奢重爲困累窮苦之狀言之痛心臣請畧陳其故貴州原設三十二驛俱係府司出辦馬匹供館各有定額先年夷民自行應役其後或以頑野不便供需乃議僉衛所軍餘代役館穀之資聽其自取始者寨皆充實民亦富朴照額兌交頗爲良便軍雖代走情亦無苦近日逃移者衆馬多久缺視之原額十減二三加之以黥夷之捐勒貧民之逋欠額數旣損供億猶仍於是軍多被累破產代辦畏患馬館有甚於征戍者

是驛傳之弊也、不惟累及於民、而軍亦重爲之累矣、以站堡言之、貴州原設站堡三十餘處、額定官軍多者四五百、少者二三百、當時猶以爲苦、近歲逃絕漸多、勾補無至、甲軍之額十減七八、站堡旣已不堪、乃議令衛所撥夫幫助、以示蘇恤、然貴州各衛差役本繁重、加以此、軍益告病、况使輶旁午、扛擡絡繹、奔走道途、妨廢生理、且以一衛一站計之、歲用夫六千有奇、其得過衛站、雖不勝其苦、猶或可支、疲憊去處、何以堪此、是站堡之弊也、不惟累及站軍、而衛所亦重

受其累矣。查得貴州有司糧差輕省，惟馬館之需，大約歲不下六七萬，其給公家者十之二三，而供過客者十之七八。費用侈繁，民財坐困。至於衛所軍丁，除本等屯糧公務差役外，其幫站走馬牌夫等項，係出編僉長役者，不下五六百人，而暫時輪差，若門皂與卒圍隨護送之類，又不可悉計。較之正差，亦幾其半。是貴州一省軍民，其財賦丁力，盡竭於驛站而耗之也。及今不爲議處，則日復一日，困敝相似，戶口日寡，而差役日重，差役日重，而逃亡日增，將來之患，且莫

知其所終矣、臣待罪地方、採之聞見、謹條爲六事、開
坐上陳、雖未足以言全惠邊民、然節冗杜浮、紓財恤
困、或可少救其千百之一云耳、

計開

一嚴禁例、切見往來使客、濫用夫馬、非其僕從之多、
輜重之盛也、蓋其陰受賄賂、附帶商貨故耳、自川湖
來者、雖有此弊、數猶無多、惟雲南地方、素產奇貨、其
石屏象牙、蘇木之類、俱係違禁、及重難物件、奸商黠
賈、憚雇倩之爲奢、樂途次之無滯、往往計賂過客、浼

水夾帶而貪鄙之徒利賈人之財遂爲容隱妄稱行李槩索軍夫駕託家丁皆騎驛馬故經過官員有行李八十餘扛者有家屬二三十人者苟非潛夾何以有此中間雖有素贖貨寶囊篋本多者要之惟附搭之弊爲甚即今貴州民窮財殫一夫一馬當他省之十濫擾若此人何以堪臣自巡歷以來痛加禁革但法例太輕人不畏警臣切以爲因時救弊宜重爲法禁今後但有夾帶私物附搭客貨與附騎驛馬者俱聽臣及巡撫都御史按察司查拿問罪其審係附搭

得實情重者，仍比照黃船事例，本人與商人各充軍，庶法重而人知畏，驛站或得少蘇矣。

一立限制，切見使客人員，所以敢於騷擾者，蓋以限制未立故耳。臣請言其最急者有二，其一謂雲南管解方物人員，橫濫太甚，往往擅作威福，凌虐官吏，多索夫馬，乃至有進寶石而五十餘扛者。各該官吏見係上供之物，無不照數應付。臣查寶石係珍貴之物，雖雲南額進之數，非臣所知，切意其不必能及此。乞行雲南巡按御史將應解方物議定若干斤，爲一

打。今後如遇起解，俱赴彼處巡按驗數定打。印給批文，以爲信驗。以杜橫濫之弊。其二謂貴州赴任官員，例有本身家口脚力，但原給關文類於中途改易，至有加增廩糧，擅用人夫，而甚者妾媵兒孫，肩輿至數，奴婢僕隸，脚力十餘，革之則遠宦羈苦，難乎爲情，與之則驛站衝疲，不勝其困。乞勅兵部酌議立爲定制，因官職之崇卑，以爲數之多寡，通諭各官使各依額帶領赴任。非此額者，不許應付，以杜騷費之弊。此二者雖若細務，但查貴州日逐應付，惟此二項爲多。

此臣之所以僭謂之最急也。其他一應瑣碎事宜，聽臣就近立法處置施行。敢有踰越者，聽臣拿究。庶法定而下可守，驛站或可少蘇矣。

一革騷擾。切見起關給驛，自有定例。近來過往關文，冒濫太甚。有稱黔國公各省買辦織造而起關者，有稱各處勢要收買寶石青碌而起關者，有差委人員而軍伴四五名俱支口糧者，有經過二司而關文十數紙通索應付者，有非係緊關事務而輒差官者，有不應給驛人數而遂支廩者，有妄稱在京衙門委官

遣牌者、有偽捏各省公幹起關者、有承差而給馬四五匹者、有齎冊而給夫二三十名者、其他濫冒、不能盡數、蓋由各省官司曲徇人情、違例妄給、而所給之人、又復買囑驛遞、洗擦關批、增添夫馬、以致附帶之弊、遂至騷擾之害爲甚、至於關批之外、其多索橫取者、其弊又不能盡數也、雖經臣嚴行裁革、然弗塞其源、其流終難杜遏、請乞通行川湖雲南撫按官、一體禁革、及行總叅三司等衙門、毋得仍前違例、濫出批關、違者聽臣查出、將出關衙門官員叅究、其一應人

情舍人關文俱行禁革不許應付庶源清而弊暫省
驛站或得少蘇矣

一實站伍查得各站堡原額正軍多者四百有餘少
者亦不下二百近來逃亡者多軍伍消乏而普市站
只存六名安莊站只存十四名湘滿查城平越等站
只存二十餘名而其多者亦不過七八十名軍少差
繁難以支撐日夜扛擡苦楚萬狀及今若不設法充
實則將來消耗勢必至於空虛而後已臣查得先年
站軍俱係罪人充發蓋亦重役以困之之意今各省

充軍人犯、臣以爲戍之衛所、則干戈未必其所能、編之站堡、則扛擡又固其所任、且得重困刑人之意、及查得先年奏准、凡貴州法應邊遠充軍者、俱發本省衛分、蓋以爲天下地遠而惡者、莫過貴州、人寡而宜實者、亦莫過貴州、若更發他省、未免移惡就善、遷寡實衆、故充發本省者、亦法之權也、近者或以惡惡太嚴、務欲遠屏、前項事例、多有不遵、非惟軍伍空乏、無以填充、抑且地方窘艱、疲於解遞、况貴州永寧、普市、赤水、畢節等處、相離省城、已逾千里、其去上下諸衛

愈益遼遠而東自鎮遠思石西至普安相距亦千餘之程若以此調彼才爲不遠臣乞自今以後凡貴州克軍人犯不分兵部編發及巡撫定衛者俱發堡站充軍若法應邊遠者亦發本省窩遠站分仍行各處巡撫凡有應發貴州軍犯一體編充站軍庶伍實而力稍舒驛站或可少蘇矣

一議協濟切見貴州藩省之設本以扼雲南之咽喉故輿地之勢僅通一線而驛站沿布纍若貫珠凡以通道路斥疆域故也目今驛站疲憊往來阻滯議處

之方所不容已。但貴州地方戶口消耗，差役繁難，有司所屬，大率皆夷。近者寨多拋荒，舊額無徵，其見在夷民亦已貧困。且夷性執拗，動稱古代，雖欲均派分毫，勢所不能。衛所戶差已兼中土軍民二役，百路腴削爲困已極，不可復有所求。在貴州議處之術，蓋已窮矣。臣思得雲南地方府庫充實，財力輕舒，或可通融計處。及見北直隸驛遞多出山東河南諸省協助，蓋裒多益寡，仁政所施，固如是也。况雲貴本爲唇齒之邦，以彼補此，事體所宜。驛站匱乏，坐滯旅客，亦彼

省之所甚病者、乞行雲南撫按計議、歲出銀一二千兩、前來協濟、著爲定額、聽臣等分撥於最疲驛站、幫助供應、庶用裕而力稍寬、驛站或可少蘇矣、

一增糧食、查得貴州舊例、衛所軍人、俱月支米七斗、惟站堡正軍、迤東貴州龍里等站、月支五斗、迤西畢節威清等站、月支四斗、臣自入境以來、站軍紛紛訴稱、月糧不敷、衣食無處、乞要比例增給、該臣看得、國初地方有事、征討頻仍、而法度方新、驛站未至騷擾、衛軍之勞、重出軀命、故其糧多、站軍之勞、徒出筋力、

故其糧少、今承平日久、衛所之士、無事坐食、而此站堡軍扛擡遞送、日夕無休、覩之勞已十倍、而糧給反減、視爲偏輕、况站軍闔門走役、生理俱妨、情甚可憫、所據月糧、似應稍加增給、請乞定議、將貴州通省站堡正軍、迄東支五斗者、增給六斗、迄西支四斗者、增給五斗、庶食足而軍免逃、驛站或可少蘇矣、